

Qanoq iliorluta Aningaasanut inatsit aqputigalugu Inuit malunnaatilimmik nersortarialimmillu inuiaqatigiit akornanni suliniuteqarsimasut, aamma takutitsisartut ilanngullugit, inuunermik sinnerani Inatsisartut aqputigalugit pisartagaqartalersissinnaanerit pillugu apeqquteqaat aallaavigalugu oqallinnissamik siunnersuut.

(Jens Kristian Therkelsen, Inatsisartuni ilaasortaq)

Akissuteqaat

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Qanoq iliorluta Aningaasanut inatsit aqputigalugu Inuit malunnaatilimmik nersortarialimmillu inuiaqatigiit akornanni suliniuteqarsimasut, aamma takutitsisartut ilanngullugit, inuunermik sinnerani Inatsisartut aqputigalugit pisartagaqartalersissinnaanerit pillugu apeqquteqaat aallaavigalugu Inatsisartuni ilaasortap Jens Kristian Therkelsenip oqallinnissamik siunnersuuteqarneranut Naalakkersuisut sinnerlugit qujassuteqarfigaara.

Siunnersuuteqartup Danmarkimi assingusumik aqqissuussisoqarsimanera innersuussutigaa tappavanimi aningaasanut inatsit aqputigalugu eqqumiitsuliortut, atuakkiortut il.il. nersortariaqartutut isigineqartut inuunertik tamaat nersornaatitut pisartagaqartinneqartarmata. Siunnersuuteqartup assingusumik aqqissuussisoqarnissaa kissaatigaa soorlu inuit qulit nersortariaqarnertik pissutigalugu pisartagaqalersinnerisigut. Siunnersuuteqartup nammineq siulersuisulimmik aningaasaateqarfiliornissaq takorloorpaa.

Naalakkersuisut aallarniutigalugu eqqaasitsissutigissavaat eqqumiitsuliornermik ingerlatsineq pillugu inatsisartut inatsisissaanut allannguutissatut siunnersuummik ataatsimiinnermi matumani sammisaqarmata tassalu Eqqumiitsuliornermik ingerlatsineq pillugu inatsisartut inatsisaat nr. 11, 6. juni 2016-imeersoq. Pineqartoq tassaavoq oqaluuserisassani immikkoortoq 118. Siunnersuummi pineqartumi eqqumiitsuliornikkut eqqumiitsuliortutut pingaaruteqartutut inissisimalersimasunut eqqumiitsuliortunut nammineq pilersitsisartunut ataqqinninniarluni tunniunneqartartunut maleruagassanik ilaatigut imaqarpoq.

Apeqquteqaat aallaavigalugu oqallittoqarnissaanik siunnersuummi, inatsisissatut siunnersuut taaneqartoq, nersornaaserneqartussanut siammasinnerusunut atuutissagunartoq Naalakkersuisut maluginiarpaat.

Siammasinnerusumik nersornaasiisarnissaq Inatsisartut aalajangiutissappassuk Naalakkersuisut isumaqarput inuunertik tamaat nersornaatisartussat kikkorpiaaneri ersarissarneqartariaqartoq. Tassa imaappoq siunertarineqartut ersarissarneqartariaqarput nersornaasiisarnissanilu malinneqartartussanik ersarissunik maleruagassiortoqartariaqarluni.

Eqqumiitsuliortut eqqarsaatigalugit inatsisissatut siunnersuut Naalakkersuisunit saqqummiunneqartoq aqputigalugu siunnersuuteqartup eqqumiitsuliortut ataqqiniarlugit nersorniarlugillu pisartagaqalersinneqarnissaat taperserneqarpoq.

Taamatut oqaaseqarlunga inersuarimi oqallittoqarluarnissaanut Naalakkersuisut qilanaarput.